



UNIVERSITÄTS-
BIBLIOTHEK
PADERBORN

Universitätsbibliothek Paderborn

Bernardini Scardaeonii Patauini Presbyteri de Castitate Libri Septem

Scardeone, Bernardino

Venetiis, 1542

Decretum ex concilio Gangrensi 82. dist. contra sacerdotes fornicarios
cap. li

urn:nbn:de:hbz:466:1-30433

DE CONIV. ET CONTI. SACER.

Decretum ex concilio Gangrensi. lxxxii. dist.

Cap. L I. contra sacerdotes fornicarios.

PResbyter si fornicationem fecerit, quanquam secundum canones apostolorum debeat deponi, tamen iuxta auctoritatem beati Siluestri, si in uitio non perdurauerit, si sua sponte confessus, adiecit ut resurgat, decem annis in hunc modum poeniteat. Tribus quidem mensibus, à cæteris remotus pane & aqua à uespere in uesperam utatur, tantum modum diebus dominicis, & præcipuis festis, modico uino, & pisciculis paucis, & leguminibus recreetur, sine carne, sanguine, ouis, & caseo utatur. Sacco indutus humi adhæreat: die noctuque misericordiam Dei omnipotentis imploret. Finitis tribus mensibus continuis exeat, tamen in publicum non procedat, ne grex fidelis in eo scādalum patiatur. Neque enim debet sacerdos publice poenitere, sic ut laicus. Postea aliquantisper uiribus resumptis, unum annū & dimidium in pane & aqua expleat, exceptis dominicis diebus, & præcipuis festiuitatibus: in quibus uino & sanguine, ouis, & caseo iuxta canonicā mensuram uti poterit. Finito primo anno & dimidio, corporis, & sanguinis domini, ne indurescat, particeps fiat, & ad pacem ueniat, psalmos cum fratribus in choro ultimus canat. Ad conuictum altaris non accedat, iuxta beati clementis uocem, minora gerat officia. Deinde uero usque ad expletionem septimi anni, omni quidem tempore, exceptis paschalis diebus, tres legitimas ferias, in unaquaque hebdomada in pane, & aqua ieiunet. Expleto septimo anni circulo, si fratres apud quos poenituerit, eius congruam poenitentiam laudauerint, episcopus in pristinum honorem iuxta beati Calixti papæ auctoritatē eū reuocare poterit. Sanè sciendum quod secundam feriam unū psalterium canendo, aut unum denarium pauperibus dando, si opus est, redimere poterit. Finitis autem septem annis deinde

deinde usque ad finem decimi anni sextam feriam nulla interueniente redemptione obseruet in pane & aqua. Hæc de fornicatione simplici: sed maiore poenitentia diluitur fornicatio, si cum spirituali filia contingat. Quare ut intelligat unusquisque, quæ poenitentia huic flagitio à legibus præscribatur, hoc quoque decretum præscriptis uerbis in medium proferamus: quod habetur in sanctis patrum decretis, trigesima quæstione prima.

Alterum decretum per coelestinum papam

xxx. q. i. Cap. LII.

Siquis sacerdos cum filia spirituali fornicatus fuerit, sciat se graue adulterium commisisse: iccirco foemina si laica est, omnia derelinquat, & res suas pauperibus tradat, & conuersa in monasterio Deo usque ad mortem seruiat. Sacerdos autem, qui malum exemplum dedit hominibus, ab omni officio deponatur, & peregrinando duodecim annos poeniteat. Postea uero ad monasterium uadat, ibique cunctis diebus uitæ suæ Deo seruiat. Hæc tenus decretum. De his uero qui contra naturam, aut cum uirginibus sacris peccarunt, quomodo etiam grauius puniantur superius suis locis dictum est. Discant modo impudici sacerdotes, quàm graue sit hoc peccatum, quod à legibus tanta poena plectatur: nec quod fornicantur plerique impunes, & pauculis psalmis, aut præcursibus absoluantur, legis poenas irrideant, quasi antiquata, & mortua: quoniam Deus non irridetur, & si quis forte ut paulo ante diximus temporariam poenam eludet, certe non euadet æternam. Nolite errare, inquit Apostolus, o Corinthii, neque fornicatores, neque adulteri, neque molles, nec masculorum concubitores regnum Dei possidebunt. Sed iam expediti à falsis, & foedis cauillationibus lasciuorum, ueluti euecti è difficillimis scopulisque cotibus, pacatiore æquore deinceps, quo secundum uentum zephiri, ductore spiritu sancto uela faciamus, & de coniugatorum molestiis, quæ collecta magis quam intellecta à nobis sunt deinceps sequenti libro referamus.

R